

Pasukan XNP rangkul Piala Pusingan



SETIAUSAHA Tetap (Pendidikan Teras), Kementerian Pendidikan, Dr. Shamsiah Zuraini Kanchanawati binti Haji Tajuddin menyempurnakan penyampaian hadiah kepada pasukan XNP (Strike No Problem) yang muncul juara bagi Kategori Berpasukan Lelaki, sekali gus membawa pulang Piala Pusingan pada Kejohanan Tenpin Bowling sempena Hari Guru Kali Ke-29 Tahun 2019.

BANDAR SERI BEGAWAN, Isnin, 30 September. - Pasukan XNP (Strike No Problem) muncul juara Kategori Berpasukan Lelaki, sekali gus membawa pulang Piala

Pusingan pada Kejohanan Tenpin Bowling sempena Hari Guru Kali Ke-29 Tahun 2019 yang berlangsung kelmarin di iBowling, Bandar Seri

Begawan, di sini. Manakala, pasukan Chung Hua Middle School (CHMS) PHOENIX muncul juara bagi Kategori Berpasukan Perempuan.

Berita dan Foto : Ak. Sy'aruddin Pg. Dauddin

Pemain Terbaik Lelaki dalam kejohanan tersebut disandang oleh Pengiran Saiful Rizal dari pasukan XNP, yang mana Pemain Terbaik Perempuan pula dimenangi oleh Marilic Dimacali dari pasukan Rimba II Striker Uno. Sementara itu, Kategori VIP Lelaki dan Kategori VIP Perempuan, masing-masing dimenangi oleh Dr. Adam bin Haji Jait dari Universiti Islam Sultan Sharif Ali (UNISSA) dan Pengiran Dr. Seri Rahayu binti Pengiran Ya'akub daripada Universiti Teknologi Brunei (UTB). Penyampaian sijil kepada para pemenang disempurnakan oleh Setiausaha Tetap (Pendidikan Teras), Kementerian Pendidikan, Dr. Shamsiah Zuraini Kanchanawati binti Haji Tajuddin. Kejohanan anjuran Jabatan Pendidikan Kokurikulum itu dibukakan kepada warga

Kementerian Pendidikan dan Kementerian Hal Ehwal Ugama (KHEU) (secara jemputan) yang masih di dalam perkhidmatan sahaja. Tujuan pertandingan diadakan adalah bagi memperingatkan Sambutan Hari Guru Ke-29 Tahun 2019 dan mengembangkan sukan Tenpin Bowling dalam kalangan warga Kementerian Pendidikan. Ia juga untuk mengenal pasti pemain dalam kalangan warga Kementerian Pendidikan yang berkebolehan untuk mewakili Kementerian Pendidikan dalam acara-acara di peringkat kementerian, kebangsaan ataupun antarabangsa juga meningkatkan tahap disiplin, daya saing dan kesihatan jasmani, sekali gus memupuk semangat harmoni dan silaturahmi warga-warga Kementerian Pendidikan dan KHEU.

HALUAN

Dari muka 2

Pada sesi muzakarah kali ini, izinkan peramba / kaola / saya mengongosikan perancangan dan beberapa inisiatif kementerian seperti berikut :

1. Pembangunan Sosioekonomi
Dari segi pembangunan sosioekonomi, dengan penyiapan projek jambatan penghubung Daerah Brunei dan Muara dan Daerah Temburong ini nanti akan membuka peluang bagi peningkatan sosioekonomi terutama sekali bagi peniaga dan perusahaan tempatan kita di Daerah Temburong. Beberapa perancangan pembangunan jangka pendek, sederhana dan panjang telah pun dirancang oleh pihak kementerian ini dengan kerjasama agensi-agensi yang berkaitan khususnya dalam menaik taraf kawasan Bangar, Temburong. Inisiatif-inisiatif di bawah perancangan perkembangan Daerah Temburong dalam bidang pelancongan dan perusahaan menuju ke arah sebuah eco-smart district melalui Jawatankuasa Autoriti Kemajuan Daerah Temburong juga sedang dan akan dilaksanakan. Usaha-usaha ini InsyaaAllah akan menggalakkan usahawan-usahawan tempatan untuk sama-sama bekerjasama dan berkongsi usaha dalam memajukan Daerah Temburong.

Dalam sektor Perkembangan Peniaga Tempatan dan Perkembangan Sektor Industri Pembinaan, antara inisiatif yang sedang dirancang ialah menyediakan satu laporan iaitu Local Business Development Assessment Report serta kriteria penilaian bagi Anugerah Kontraktor Cemerlang. Sehubungan dengan itu, kementerian sedang meneliti semula Prosedur Pendaftaran Kontraktor dan Pembekal yang mana dijangka siap dan akan dikeluarkan pada penghujung tahun ini.

Usaha-usaha ini adalah bertujuan bagi mendukung seruan Kerajaan Kebawah Duli Yang Maha Mulia untuk meningkatkan peluang-peluang pekerjaan kepada anak-anak tempatan serta mengembangluaskan kemahiran latihan teknikal dan vokasional. Ia juga diharap untuk terus membina bakat dan kepakaran anak tempatan dalam industri pembinaan serta menjadi pemangkin kepada pembangunan industri tempatan nanti.

Dengan adanya inisiatif-inisiatif ini adalah diharapkan akan dapat membangun kapasiti kontraktor tempatan selaras dengan hasrat kementerian ini bagi mendukung kontraktor tempatan untuk bersaing di peringkat serantau dan antarabangsa dengan memastikan kontraktor dapat meningkatkan kualiti dan produktiviti industri binaan.

Dalam hal perancangan bandar dan desa serta hal Guna Tanah, pihak kementerian telah mengenal pasti beberapa kawasan tapak tanah kerajaan (government land lease dan infill) untuk

dibukakan kepada pelabur-pelabur tempatan secara pajakan bagi tujuan pembangunan mixed development. Ini termasuklah mengenal pasti beberapa kawasan kecil dengan kemudahan infrastruktur yang minima bagi menggalakkan majlis-majlis perundingan kampung untuk membuat aktiviti-aktiviti keusahawanan di kawasan kampung masing-masing.

Dengan adanya inisiatif ini, pihak kementerian mengharapkan penglibatan Ahli-ahli Yang Berhormat dan ahli ketua-ketua kampung untuk sama-sama membantu anak-anak kampung berkecimpung dalam bidang keusahawanan yang boleh menyumbang kepada sosioekonomi negara.

2. Pembangunan Infrastruktur
Peningkatan ketahanan serta perkembangan kemudahan infrastruktur bagi mendukung perkhidmatan yang berkesan kepada orang ramai juga menjadi fokus utama terutamanya dalam menjamin:-

a. Sekuriti Sumber Air dan Perkhidmatan Bekalan Air
Permohonan bagi kajian kemungkinan bagi tujuan pengangkutan sumber air di Daerah Temburong (transboundary water) ke Daerah Brunei Muara adalah termasuk dalam perancangan kementerian ini di bawah sektor kemajuan infrastruktur. Usaha ini adalah bagi mendukung tambahan bekalan air ke Daerah Brunei Muara yang mana di sasarkan sebagai satu kontingenis bekalan air negara jangka panjang. Selain dari usaha penggantian paip air dan usaha bagi menurunkan masalah kebocoran (Non Revenue for Water) di sebabkan oleh sebahagian sistem paip air yang sudah lama dan mengalami kekerapan kebocoran, kajian kemungkinan ini akan dapat menyumbang kepada pencapaian pelan tindakan bagi memenuhi pelan strategi pihak kementerian dalam menjamin bekalan air yang berterusan. Kementerian Pembangunan juga mengambil maklum akan keluhan orang ramai mengenai kekerapan gangguan dan penutupan bekalan air dan mengambil masa yang panjang untuk diperbaiki. Walaupun perkara ini memang tidak dapat dielakkan tetapi pihak kementerian akan berusaha menangani perkara ini secara berterusan dari semasa ke semasa.

Mengenai dengan cadangan pemasangan smart prepaid meter, pada masa ini ia dalam penelitian untuk dilaksanakan secara berperingkat-peringkat bermula pada penghujung tahun ini; ia adalah bertujuan bagi menggalakkan penggunaan air secara berhemah. Ini juga adalah bagi menangani isu bebanan tunggakan air yang berlanjutan yang dihadapi oleh kementerian pada masa ini. Beberapa

usaha lanjut dalam peningkatan polisi, teknologi dan perubahan minda juga sedang diungkayahkan bagi mempraktikkan penjimatan dalam penggunaan air.

b. Perumahan
Dalam usaha mencapai matlamat Wawasan 2035 dalam meningkatkan peratus pemilikan kediaman sebanyak 85% dan bagi memastikan Skim Perumahan Negara dapat berdaya tahan, pihak Kementerian Pembangunan bersama agensi-agensi kerajaan yang berkenaan sedang merumuskan program bantuan perumahan secara holistik dan integrasi dengan agensi-agensi Kerajaan dan seterusnya mengkaji alternatif Perkongsian Awam - Swasta yakni 'Public Private Partnership' (PPP) ke arah mengurangkan kos perbelanjaan program RPN dan konsep commercialisation juga turut giat dilaksanakan bagi mendukung kegiatan sosioekonomi negara.

Pada masa ini, pihak kementerian telah pun bekerjasama dengan pihak GLC Kementerian Kewangan dan Ekonomi iaitu P-kiub bagi sama-sama membincangkan tatakara kaedah PPP bagi projek perumahan yang mana insyaaAllah akan dilaksanakan pada penghujung tahun 2019 ini. Bagi perumahan H40 pula, penyediaan garis panduan dan perjanjian kediaman sedang dalam progres penyiapan untuk dibukakan kepada pemohon-pemohon Skim Perumahan Negara yang layak.

3. Isu Alam Sekitar
Pembersihan Sungai Brunei juga turut menyumbang kepada pengawalan isu global marine debris dengan penglibatan dari semua lapisan masyarakat. Melalui usaha Jabatan Alam Sekitar, Taman dan Rekreasi, Alhamdulillah pertukaran minda terutama sekali di kalangan golongan muda telah mencapai pendekatan yang positif dalam sama-sama menjaga dan menjamin kebersihan dan keindahan negara. Ini dapat dilihat dari penglibatan semua pihak termasuk pihak swasta dan NGO's dalam sama-sama menguatkan kesedaran orang ramai untuk melibatkan diri bagi membuat perubahan.

Keberkesanan usaha perubahan minda melalui inisiatif 'Setiap Hari Tanpa Beg Plastik' yang bermula dari 1 Januari 2019 dan penakian cukai sebanyak 3% terhadap pengimportan produk-produk plastik, telah dapat dilihat dan usaha ini sedang dilartakan ke semua pihak lapisan perniagaan terutama sekali kedai-kedai runcit dan vendor makanan.

Usaha melindungi dan memelihara alam persekitaran perlu selaras dengan perkembangan Revolusi Industri 4.0 di mana negara perlu meningkatkan kecekapan dalam pengurusan alam sekitar secara ber sistematik. Ke arah

ini penekanan ke arah putaran ekonomi atau circular economy perlu diberi perhatian khusus supaya negara kita tidak ketinggalan dari segi teknologi yang boleh menangani isu-isu alam sekitar. Penglibatan dari pelbagai pihak dan sektor memainkan peranan yang penting bagi sama-sama mendukung Matlamat Wawasan Negara 2035 di mana perlindungan alam sekitar adalah termasuk dalam salah satu tanggungjawab Kementerian Pembangunan seperti mana yang dinyatakan dalam Pelan Strategik 2018-2023 iaitu untuk mencapai pembangunan yang seimbang dalam aspek-aspek sosial, ekonomi dan alam sekitar di negara ini bagi menjamin generasi hari ini dan masa depan.

4. Industrial Revolution 4.0
Kementerian Pembangunan juga bertanggungjawab di dalam mendukung Majlis Ekonomi Digital yang dipengerusikan bersama oleh Menteri Pengangkutan dan Infokomunikasi dan Menteri Tenaga (Tenaga dan Tenaga Manusia) dan Perindustrian untuk mendukung ke arah hasrat negara sebagai Smart Nation.

Sebagai langkah ke arah ekonomi digital, pihak kementerian pada masa ini sedang merebui pelan strategik kementerian khususnya untuk menjadikan kementerian ini sebagai 'Smart MOD' iaitu dengan mengenal pasti perkhidmatan yang sedia ada boleh diintegrasikan dan seterusnya didigitalkan bagi memudahkan cara proses permohonan.

Perkhidmatan digital di Kementerian Pembangunan masih di tahap minimal yang mana orang ramai boleh memilih untuk menghadapkan permohonan ke kaunter perkhidmatan. Oleh yang demikian, sebagai langkah pertama untuk menjadikan Smart MOD, pada masa ini, pihak kementerian sedang mengenal pasti perkhidmatan yang ada untuk disatukan dalam satu aplikasi yang mana orang ramai boleh menggunakannya dengan satu klik sahaja. Ini bukan saja memudahkan kementerian dalam mengutip bayaran, ia juga akan menyenangkan orang ramai untuk membuat permohonan dan transaksi dengan semua jabatan-jabatan di kementerian ini.

Kementerian Pembangunan akan sentiasa bersedia memikul amanah di dalam memastikan kesejahteraan rakyat dan penduduk adalah terjamin melalui penyediaan prasarana dan pelan perancangan yang menyeluruh.

Ini adalah termasuk perancangan dalam meningkatkan mutu kualiti perkhidmatan yang sedia ada seperti peramba / kaola / saya sebutkan tadi. Sekian itu saja yang dapat dikongsikan dan semoga permuakharahan kita pada pagi ini akan memberikan hasil yang dihasratkan dan dapat menanam semangat dan usaha perpaduan dalam usaha kita sama-sama mencapai ke arah visi negara 2035.

Wallillah Taufik Wassalamualaikum Warahmatullahi Wabarakatuh.